

介盦先生事略

樾村觀先先生肖像



昆明縣文獻
科移交圖書館

樾村觀察先生像贊

於穆先生閎肆譚粹劍海金華出類拔萃韶髫構亂杜林苦志
兵燹間關博貫典記渾金璞玉霽月光風去就有分彊直守中
汗茵淵度投膝大公陂涵千頃日照三冬先生德行莫罄形容
亦漢亦宋有詩有筆瓦礫見道耆舊搜佚餘事雕蟲野史紀實
董策賈論阮牋陳檄先生文學彬彬秩秩火舉待嬰飯足讓鄒
扶義毀家愛才如命當世陽秋人倫水鏡攝事辭祿處脂不潤
任智方廉先生所性洗兵滇洱高配魯連贊劉翬岑靖匪鎮邊
保商創始計岸改弦權土剔弊督饒任賢綜釐筦學肆應聯翩
先生事功阡焉炳焉牧酉行春病瘳憂喜高陵罷訟視民猶子
賑電恤火臧書課士鹽茶晉攝庶事條理再權臬符威申獬廌

永甯

特簡陳力監司豪宗貪墨是彈是禡廿有五屬飲甘

含滋先生吏治侯其禕而通駿有聲達於

九陞

御屏

紀錄

璽書褒美時方多故瞻烏爰止于鈍鉛剡蒿目拊髀

望雲陳情乍欲遂初吾道未非至德不孤絲繡金鑄昨盎難撫
但有目者視此楷模

西陽弟子陳迪光謹述

介庵先生事略

弟子周鍾嶽述

先生字介庵別字樾村劍川趙氏曾祖允讓先生州庠生耆年碩學望重鄉閭教授弟子成就甚盛州志有傳祖礪軒先生慷慨任俠富而好禮施濟之澤普及一州省志州志均有傳父拙菴先生附監生議叙州判人品純正學問淵雅州中人材多出門下先生生而奇慧五歲授書過目成誦有神童之稱家富圖籍胚胎庭訓年甫十六七經史有用之書涉獵殆徧下筆千言議論閎偉郡中先達楊杏泉大令李蘊川孝廉陳復菴處士皆譽爲命世才時滇中回匪搆亂已七八年郡邑被寇所在騷然先生侍諸父奉祖母轉徙避亂居無寧處而仍不廢學同治戊辰先生年十八矣回匪

以全力攻圍雲南省垣三迤州郡淪陷殆盡先生憤賊焰之猖狂憫民生之塗炭與族叔敏堂先生秘謀糾約邑中忠義之士歃血定盟自捐餉械恢復桑梓爲釜底抽薪之計以遙解省圍遂於戊辰五月五日用蠟丸書密約護維西協副將張君潤內外夾擊襲復劍川州城分兵規取麗江鶴慶所謂北路義師是也然我兵新集糧餉不時濟而賊援大至竭力戰守者五閱月奸人應賊劍城復陷敏堂先生闔門殉難先生舉家避之麗江巨甸里復與張護協收合敗殘經營數月進規麗江克復府城繼克劍川州城分規鶴慶浪穹鄧川而永昌騰越順寧緬寧諸路義師亦颺然響應賊東西奔救竭蹶不遑省圍以解師行大順北路義師得與諸路聯合二年之內遂連復數十城合圍大理掃穴擒渠全滇肅清凡北

路一軍運籌決策草檄飛書皆先生綜其事一時有小諸葛之目
先生顧恪守庭訓不廢讀不妄殺不取金帛不邀獎叙專以完滅
賊救民心事凡遇奏凱開保悉堅卻之亂平年廿二矣始橐筆應
試冠其軍補弟子員次年試優等第一經古第一補廩餼又次年
中式光緒乙亥帶補壬戌本省鄉試第四名舉人兩赴春官試薦
不售就四項教職候銓選授易門縣訓導易門去省治僅三日程
鹽法使者鍾公念祖先生郡試受知師也知易門學有二齋一教
諭足治學事啓於大府聘先生佐鹽署幕府先生遂於履任後至
鹽署襄事而與易門諸生約學課試卷郵寄評閱學署租穀雜項
悉以奉東齋一無所取如是者有年士樂其評騭之精允東齋亦
樂其崇讓而濟窘也時論歎爲從來冷官所未見會

大計蒙撫帥譚公疏薦卓異署考曰枕經薛史矜式士林衆謂褒如其分無一字夸詡云制府西林岑襄勤公深器先生使幕僚全庶熙廉使女夫唐珮瑗直牧屢道意致幣聘先生以鍾公相遇厚婉謝之至鍾公引疾去官後乃就襄勤聘司牋奏並爲諸公子講討厯史謚正文字終襄勤任相得甚歡先生崇廉持正是非所在謇諤不阿襄勤以是尤深敬服每謂諸公子曰趙君學問閎達固是通才其立心制行正大敦厚余所見僚友殆無其匹余身後事終當託之汝輩所宜敬事其識之勿忘厥後襄勤薨於位遺疏喪禮一切鉅細皆先生經畫井井有條無一滲漏是時幕友星散中丞譚公兼督篆仍聘先生綜牋奏先生陳明受襄勤深知當始終其事譚公亦動容稱歎人以是服襄勤之知人先生之酬知均非

尋常所能窺測也先是先生以訓導俸滿見制府劉武慎公爲畫策平雲州劇匪石炳元敍功保薦以知縣候選嗣佐襄勤幕爲畫策平順甯猱黑夷匪改置鎮邊廳敍功開缺免選知縣以直隸州選用加知府銜至是送襄勤喪歸粵後乃請咨入京候選復兩應會試報罷計先後六應會試四薦不得售先生已無復科名之志襄勤諸公子助之貲乃遵例指發四川需次到省後充籌餉局提調次年奉檄署酉陽州時州及所屬秀山新有教匪之亂辦理失平地方殘破豪猾復藉以報怨買官彈劾大獄以興官紳惴恐綱紀頽壞盜賊滿野人心搖搖先生叱馭而往受事三日卽輕騎至秀山名捕豪猾撫安黎元收下移之權歸於邑令出示練團緝匪有持刀游行者嚴治之八日而秀山大定人心安堵奉制府定

興鹿公秘檄以密奉

廷寄鈔發言官彈疏交查頭緒紛繁羅織轆轤先生一一如原疏按察具得虛實一無假藉據實復陳鹿公覆奏至京之日言官亦適以贓敗奉

旨查辦核實著毋庸議良愿被保全者無算風波既定先生乃盡心治理下教求言具得利病裁革書役向納於官之規費二千餘金約之以法遂不敢肆日坐堂皇收詞聽訟明察情僞判決平允顧不自喜每事叅以化導至誠惻怛多有警省感激因以罷訟者初至日聽廿餘案率至夜分三月後日不過十餘案半年後日不過三四案終任凡結新舊二千餘案民自以無冤月必按行鄉鄙三四次從役四五人飲食自備所至存問父老勸勵士農而詞

察姦詭盡法懲治椎埋之徒聞風遠避有鼠雀之爭就與平之鄉
氓以爲數十年所未見西之士子多刻苦嚮學惜多寒畯又鈔藏
書先生捐廉籌款購經史子集八千餘卷置之二酉書院供多士
鈔閱復立經古時務課月舉三次躬自評閱優予獎勵學校奮興
爭自濯磨得通經致用之士十餘人餘亦粗知學問門徑風氣大
開吳移香學使按試至酉所取士皆先生獎拔前茅者學使與先
生爲同年生試畢譙於公廨學使手巨觥爲先生壽曰所以酬賢
太守教課有素衡鑑有真也先生笑而乾之州東被雹災州城被
火災損傷至鉅先生皆捐廉數百金復請帑勸募親爲賑恤民無
失所瓜代而去士民攀送自州城以至龔灘凡三日程香花載路
老稚依依先生亦眷眷如去鄉里也至涪州奉檄留筦官運鹽局

不兩月制府鹿公電調晉省檄委督辦川東土稅釐總局先生以不嫻會計堅辭鹿公謂總辦之職在知人善任規畫大利害持籌握算自有司存以君廉明知大體故以畀君君其無辭先生則陳三事一請各分局委員無論正佐得自爲選派以重事權一請以總辦餘平公費均之委員以養其廉一請移總局於涪州以握土藥之總匯鹿公慨然嘉許曰一切假君便宜吾但以有無成效課功過君勉之矣先生馳赴萬縣入局受事卽出巡所屬局卡周歷二千餘里地勢商情員司賢否察訪明確分別釐剔別定章程與各委員約曰今總辦餘平公費已陳明制府與諸君均之足以養廉舊日總局札費節禮各陋規一律裁革足以省累繼自今宜一心公家核實稽征以益帑項嚴禁書巡婪索以恤商艱功罪所在

豪不假藉各聽自擇而已遂移局涪州綜理督征先是此局爲某太守創開稟定六成征收而實征四成規制草率上下相蒙因緣爲奸利橐滿遷去又薦其鄉人某太守爲代踵其故習變益加厲賣放苛罰率歸中飽鹿公廉知其弊混故履任卽以雷仲宣太守往易之雷太守求治心急而未盡得其要領出以操切打卡之案疊出故鹿公復選擇而用先生且以涪州而上至敘府各土局皆歸併綜理先生至後去貪劣革陋規定章程耳目一新實事求是委員司事奉法維謹土商無需索留難之病繞越日稀乃獲征足六成行之一年征欸所入贏前二倍而部章通飭征足十成商情疑阻觀望辦理甚艱鹿公憂之原許先生一年有效當以瀘資大州酬其勞勩至是復手書獎詡先生而勗以力爲其難征足十成

以需後命先生乃瀝陳商艱力請寬留除皮隱寓體恤以期集事
鹿公允之商情欣悅征收無梗果足十成行之半年又益贏數十
萬而鹿公忽爲某將軍所擠開缺以去某將軍故習聞鹿公許以
大州酬勞之語使人諷先生以五千金爲壽當委權瀘州先生婉
謝之尋具牘請假省親歸滇司道諸公惜先生之去而慮其不復
出也則檄查滇黔土商改道情形以縻之先生至家循陔侍養不
欲復出會庚子京師之變

車駕西巡滇亦俶擾滇督丁巡卿制府滇藩李仲山方伯乃走使
速先生至昆明檄委會辦全省團營以固邊圉迨和議寢有端倪
滇防解嚴復檄委先生賈護貢品赴西安

行在先生至陝目擊秦晉奇荒悉索家貲以萬金助賑經岑雲階

中丞入告奉

旨以道員仍留川補用引 見後蒙

召見一次回川需次時川商行鹽濟楚受制於沙市宜昌行戶日
行折閱川督奎樂峯制府 奏委先生赴沙市創設保商總局鄂
督張香濤制府與奎制府有違言先生擬保商章程六條往見張
公瀝陳設局於川鄂交益義正而辭婉張公意解得開局辦理規
模大定主客協和商銷頓暢不三月先生奉川督岑雲階制府電
調回川署鹽茶道兼綜理通省釐金迺薦何棠蓀觀察爲代踵先
生成法行之兩年商欠七十餘萬陸續收回歲有取贏濟楚根基
始穩固不搖公私交益至今猶稱道先生創成之功云先生之至
成都也岑公事無不問先生亦知無不言匪黨之強弱分合官軍

之戰守勤惰吏治優劣民情欲惡先生言之岑公采而行之一時如嚴飈之掃秋籜甘雨之起稿苗又如明鏡之鑑形平衡之權物糜濫之蜀不三月復轉爲治安岑公握其綱先生司其隱也於是始開辦四川學務警務工業武備諸新政學堂而理財所最注重則鹽道計岸仿照滇黔改辦官運一事岑公欲竟丁文誠未竟之志詢謀互有異同岑公銳意爲之檄鹽道黃君權梟符而以鹽篆畀先生實倚以創成官運先生選用廉能開局署側昕夕籌議規畫兩月而宏綱以立細目具張事體大定岑公欲重留先生久署以觀其成先生以規模既定但得持守毋懈自可觀成不欲久涸腥羶損其志趣力啓岑公檄黃君返任聞者歎異岑公亦謂爲卓有古君子之風也岑公疏薦先生廉正平實宏遠精深曩辦土稅

解款增倍現綜鹽茶釐金剔除積弊嚴而不苛求之近日監司實難多得請破格錄用奉

旨交軍機處存記先生既謝鹽篆岑公 奏委總辦滇黔官運局

未行而改委署理川臬聲明俟卸署任後到局局事交會辦張襄甫觀察代理公事包封判行不領薪水岑公皆許之先生署臬五閱月兼綜學務辭去釐金於進退人材提點刑獄造就師範整理巡警多所規定自護院陳公鹿笙以至監司諸君靡不敬而愛之苟且之政甫萌芽而卽摧苟且之心未宣露而自止者蓋不知凡幾也既卸臬篆奉檄赴瀘領饒局先生以爲滇黔邊計官運鹽務丁文誠創辦宏綱細目精核詳密具在方冊行之廿餘綱成效昭著法已盡善惟人才凋謝寢成徒法故亟亟以別汰委員司事之